

Allannguutissat siunnersuut uunga siunnersuummut: Uumasut nappaataannik inunnut tunillaassorsinnaasunik taakkulu akuinik siaruaassinnaasunik akiuiniarneq pillugu Inatsisartut inatsisaat nr.xx, xx 2015-imeersoq.

Akissuteqaat

(Aalisarnermut, Piniarnermut Nunalerinermullu Naalakkersuisoq)

Aappassaaneerneqarnera

Naalakkersuisut siunnersuummut matumunnga Aalisarnermut, Piniarnermut Nunalerinermullu Ataatsimiititap peqqissaarluni suliaqarsimaneranut ataatsimiititallu isumaliutissiisutaanut qujapput.

Ataatsimiititap inatsisissat siunnersuutip siullermeerneqareernerata kingorna suliaqarneranut atatillugu inatsisissat siunnersuutip imarisaanut tunngatillugu allaffigeqatigiitarnert pisimapput, tamannalu Inatsisartunut allannguutissat siunnersuummik nassataqartitsisumik kinguneqartumik.

Aalisarnermut, Piniarnermut Nunalerinermullu Ataatsimiititap isumaliuutissuuteqarnermini inatsisissamut siunnersuummut pineqartumut oqaaseqaateqarpoq. Ataatsimiititap oqaaseqaataanut Naalakkersuisut qujapput, isumaliuutissuummillu tunuliaqutaqarluni Naalakkersuisut tullinnguuttumi Inatsisartunut nalunaarummik saqqummiussaqaarlutik, ataatsimiititap isumaliuutersuuteqarnermini pissutsinut tunngasuni nalunaaruteqaqqusineranut atatillugu.

Ataatsimiititaliap isumaliuutissiissummini kissaateqarluni nalunaarutigivaa Naalakkersuisut Inatsisartunut ukununnga tunngasunik nalunaaruteqassasut:

Siullertut ataatsimiititaliap apeqqutigivaa siunnersuummi matumani Inatsisartullu peqqussutaanni aalajangersakkat imminnut akerleriinginnissaat, taamaalillutillu aporaassutaalinnginnissaat Aalisarnermut, Piniarnermut Nunalerinermullu Naalakkersuisoqarfimmit qulakkeerneqareersimanersoq nassuiaatigeqqullugit?

Naalakkersuisut apeqqutigineqartumut atatillugu qulakkeersinnaavaat Aalisarnermut, Piniarnermut Nunalerinermullu Naalakkersuisoqarfiup nalinnaasumik nassuiaateqartitsisarnermi periutsinut akuerisaasunut tunngaveqarluni suliaqarmat, matumani inatsilerinermi periuseq ”lex Posterior (inatsit nutaaq)”, kinguneqartitsisarmanat inatsimmit nutaanngitsumit kingunertigut inatsisiliarineqartumit sallinngortarmat. Periuseq allatut oqaatigalugu imatut kinguneqartarpoq, inatsisit nutaannginnerusut inatsisinit nutaanernit tunuartinneqartarmata. Uumasut nappaataannik tunillaattuussinnaaneritut Inatsisartut peqqussutaanni maleruagassat taamaasil-

lutik uumasut nappaataannik inunnut tunillaassorsinnaasunik taakkulu akuinik siaruaassinnaasunik akiuiniarneq pillugu Inatsisartut inatsisaat nr.xx, xx 2015-imeersumut tunuartinneqassaaq.

Naalakkersuisut naatsorsuutigivaat pissutsit pisarneratut iluseqaleqqissasut aappaagumut upernaakkut ataatsimiinnermi pisinnaanissaa, taamaasilluni uumasut nappaataannik inunnut tunillaassorsinnaasunik taakkulu akuinik siaruaassinnaasunik akiuiniarneq pillugu Inatsisartut inatsisaat nr.xx, xx 2015-imeersoq kisimiitsillugu malittarisaliuunneqassammat.

Ataatsimiititaliap aammattaaq maluginiarpaa Kalaallit Nunaanni Politimesterip tusarniaanermut akissutaanut tunngatillugu apeqqummut akissummi oqaatigineqartoq ataatsimiititaliap maluginiarsimagaa, tassa tusarniaanermut akissut ”*akiffissamut piffissarititaasumut naleqqiullugu kingusissumik takkuppooq aamma inatsisissatut siunnersuut inatsisinik ilusilersuivimmuut nassiutereernikuvoq.*” atatillugu ataatsimiititaliamit oqaatigineqarmat tusarniaanermut akissuttip ullulernerqarneranut tiguneqarsimaneranullu paasissutissiineq pissusissamisut nalunaarutigineqanngimmat Naalakkersuisullu apeqqummut naammaginartumik akissuteqanngitsut: Apeqqummut tassunga tunngatillugu Ataatsimiititaliap apeqquteqarpoq siunnersuut atuutsinneqarsinnaanersoq pillugu politiit naliliissutaannik Naalakkersuisut siunnersuummut inaarutaasumut atatillugu pissarsiniarsimanersut aammalu siunnersuuttip atuutsinneqarsinnaanera Naalakkersuisut taamaalillutik qulakkeersimaneraat.

Naalakkersuisut ilisimatitsissutigissavaat politimesterip tusarniaanermut akissuteqaatip kingusinaarluni tigusimaneranut apeqqummut tunngatillugu tusarniutaasumut allamut akissuteqarnermi paarlaattoorneqarsimasoq, Naalakkersuisoqarfiullu uppersarpaa tusarniaanermut akissuteqaat piffissaagallartillugu tiguneqarsimasoq.

Naalakkersuisut nassuerutigissavaat apeqqut naammaginangitsumik akineqarsimammat.

Siunnersuut atuutsinneqarsinnaanersoq pillugu politiit naliliissutaannik Naalakkersuisut siunnersuummut inaarutaasumut atatillugu pissarsiniarsimangillat aammalu siunnersuuttip atuutsinneqarsinnaaneranut apeqqummut tunngatillugu, siunnersuutigineqartup allanngortillugu nassiunneqarnerani § 9, imm. 1-mi oqaaseqatigiit tusarniaanermi oqaasertaasunut naleqqiullugu allanngortinneqanngimmat. Naalakkersuisut taamaammat inatsisissatut siunnersuuttip § 9-mut atatillugu siunnersuuttip pingajussaaneerineqannginnerani allannguutissatut siunnersuummik saqummiussaqaalikkersaarput.

Taamatut oqaaseqarlunga Naalakkersuisut inassutigivaat allannguutissatut siunnersuummut atatillugu aappassaaneerineqarnera akuerineqassasoq aammalu siunnersuut tamatuma kingorna taamatut isikkoqartillugu akuerineqassasoq.